




Lieschtler Fasnecht 2015

D Bänk vom Muser Schang



Mi Bueb, der Urs mags nit modärn, isch nur no dSchuel am schwänze,
vo neue Lehrplän halt er nüt und neue Kompetänze,
do zLieschtel well er nüm in dSek, es heb sich ummegsproche,
in Prattele dört ler me no uf alte Pfanne choche!

Ich bin Tourischt, such Bed & Breakfast, brauch e Nächtle Pause.
Sagt an, gibt's eine Schlummermutti hier bei euch in Lause?
Ach nein, weil unser Schlummermutti hatte solche Flausen,
das wurde eine Schummelmutti und hat's müssen hausen!

Je suis Francois Hollande et Je suis Charlie,
Je suis Brigitte Bardot et Je suis Charlie,
Je suis Mireille Mathieu et Je suis Charlie,
et je suis Gerard Depardieu et Je suis Chablis!

Zwei fräschverschossni Djihadische hei im Himmel gschraue:
Mohamed, wo si jetz die siebzg versprochene Jungfraue?
Do rauft der Mohamed der Bart und rüeft under Träne:
Syt geschter alli an der Charlie Hebdo Orgie äne!

In Züri hets e Freispruch geh für e Karli Dall,
vergwaltige und schände cha de uf gar kei Fall,
do nimmt me denn as alte Fan nur ei Erkenntnis mit:
Bim Dall hangt allem Aschyn a nit numme sAugelid!

D Fusion isch abverheit, es goht nüm abverheiter,
hei ei ei ei – abverheit, es goht nüm abverheiter,
hei ei ei ei hei ei ei, – nüm abverheiter, gseither,
do fällt mir nüt meh i, as nur: Guet Nacht, Frau Schneider–Schneider!
Und bevor I s no vergiss: Guet Nacht, Herr Kirchemayer,
s neggschtemol do singe Sie und gönge mir uf dEier!

Vil zfrüh hei Udo Jürgens und Joe Cocker müesse go,
wär will die Lucke fülle uf dem Topniveau?
I gwöhn mi nie an Luca Hänni und die Art Entertainer,
gnau wie mi nie ans Niveau gwöhn vo Unterflurcontainer!

Jetzt mol e churzi Zwüschefroog, nur e chleine Seich:
Weisch, was isch unde hert und obe bireweich?
Grad hindrem Bözbärg isch die Froog en absolute Brüller:
Unde hert und obe weich, das isch der Geri Müller!

Glubschaue und Schilddrüse, do gits e Zämmehang,
Bim Doris Leuthard, ehrlich gseit, dank I das scho lang,
Drum hätti do e guete Tipp ans Doris si Adrässe:
He eifach jetz die Jodtablette zerscht mol sälber frässe!

Rot isch mini Nase und rot si mini Hoor,
rot isch au mi Schnauz, nur schwarz isch mi Humor,
doch sRot chunnt us der Mode, gsehschs bim Regierigsrot,
dört isch nur rote sjäggli vo der Gschwind no rot!

Mi Frau muess sofort alles ha, was neus vo Apple git,
iTunes, iPhone, iMac, iCloud, iPod, iPad, iPid,
iWord, iBook, iChat, iMail, – ab sofort proteschtieri,
jetz wet sie none iSprung bi Apple in der Gfrieri!

Ohni mi Brülle am ne Buffet zBasel ischs passiert,
d Conchita Wurscht stoht näbe mir und erscht no fräsch rasiert.
Conchita, han I gseit galant, wetsch au e Löffel Hörnli?
Do macht dConchita: Gohts no guet, I bi dTamara Wernli!

Was dänkt e Lieschtler Beizer ächt churz vor em Bankrott?
De dänkt sich sicher: O I ha der falschi Bruef, bi Gott!
Wenn I as Lieschtler Beizer do so schlächt muess bilanzieren,
wär I au lieber Figaro und wüssti, wie frisiere!

E chleini, spitzi Wandermus het en Affäre gha,
grad rächts bi Laufe uf me Acher mit me Müslima.
Drei Wuche spöter in de Wehe verfluecht sie die Affäre:
Niemeh mit eim vo Laufe, wo d nit weisch, wo gebäre!

Zwei frommi Djihadische chömme am ne Puff verbi,
do plötzlich macht der eint der ander mit me Chopfschuss hi,
derbi het de doch numme gseit: Bi Allah, s würd mir gfalla,
im Sündepfuhl go bumm, bumm, bumm alli Schnalla knalla!

Am Nil do frisst e Krokodil e Fischer, sisch zum Gruse,
nur no der Chopf luegt vorne trurig us der Schnure use,
do rüefe uf em Dampfer duss dTourische: Lueg bigoscht,
chum öppis z'Bisse hei sie, aber Schlofsäck vo Lacoste!

